



Mirko Šarović, ministar vanjske trgovine i ekonomskih odnosa BiH

U TRI FIRME OTKRIVENO 725 LAŽNIH STOČNIH PASOŠA

Zbog zloupotreba zabranjen izvoz mesa u Tursku firmama Bajra iz Travnik, a i Suša komerc iz Visokog. Osim ove dvije firme, sumnja se i na kompaniju Šišović iz Rakitnog, ali ovoj firmi još nije oduzet a dozvola

Ministarstvo vanjske trgovine i ekonomskih odnosa BiH u posljednja četiri mjeseca, zajedno sa nadležnim institucijama BiH i entiteta, provodi nadzor i kontrolu pet objekata koji se bave bescarinskim izvozom mesa u Tursku, tokom kojih su evidentirane određene nepravilnosti, potvrdio je resorni ministar Mirko Šarović.

Izveštaj u Tužilaštvu

“Do sada je otkriveno 725 lažnih stočnih pasoša u tri izvozna objekta. Otkrili smo i slučajeve štampanja falsifikovanih ušnih markica za stoku, što je činjeno u jednoj od susjednih zemalja. Uočili smo i propuste i neadekvatno postupanje veterinarskih inspektora prema propisanim procedurama. Također, za jedan broj grla nije utvrđeno bh. porijeklo i zatražena je asistencija Uprave za indirektno oporezivanje. U svakom slučaju nadležne institucije rade svoj posao”, rekao je Šarović.

Prema njegovim riječima, istraga je posao nezavisne institucije, odnosno Agencije za istrage i zaštitu (SIPA).

“Imamo informacije da su sve ono što su smatrali potrebnim dostavili Tužilaštvu BiH. Mi kao Ministarstvo nismo ulazili u taj dio aktivnosti”, rekao je ministar vanjske trgovine i ekonomskih odnosa BiH.

Tužilaštvo Bosne i Hercegovine primilo je izvještaj SIPA o poduzetim aktivnostima u predmetu ko-



Šarović: Očekuje nastavak izvoza mesa

Foto: D. ČUMUROVIĆ

NEPRAVILNOSTI

Otkrili smo i slučajeve štampanja falsifikovanih ušnih markica za stoku, što je činjeno u jednoj od susjednih zemalja. Uočili smo i propuste i neadekvatno postupanje veterinarskih inspektora prema propisanim procedurama. Također, za jedan broj grla nije utvrđeno bh. porijeklo i zatražena je asistencija Uprave za indirektno oporezivanje

ji se odnosi na izvoz mesa u Republiku Tursku, rečeno je jučer za Fenu u ovoj instituciji. Odluka o narednim koracima Tužilaštva BiH u vezi s ovim slučajem biće donesena nakon analize zaprimljenog materijala.

“Očekujemo nastavak saradnje sa Turskom i to je razlog zašto ne objavljujemo imena firmi”, kazao je ministar Šarović.

Bescarinski izvoz mesa u Tursku

zloupotrijebile su tri firme. Dvema je, kako smo saznali u Ministarstvu vanjske trgovine i ekonomskih odnosa BiH, zabranjen izvoz mesa u Tursku, odnosno oduzeta im je licenca za izvoz. Riječ je o kompaniji Bajra iz Travnik i Suša komerc iz Visokog. Osim ove dvije firme, sumnja se i na kompaniju Šišović iz Rakitnog, ali ovoj firmi još nije oduzeta dozvola za izvoz.

Ranije su mediji objavili da je od



1. januara ove godine Ministarstvo vanjske trgovine i ekonomskih odnosa BiH obustavilo izvoz mesa u Tursku, jer od tog datuma do danas nije izvezen ni kilogram.

U Ministarstvu su nam pojasnili da nije riječ ni o kakvoj zabrani, odnosno obustavi izvoza nego je riječ o tome da izvoz mesa u Tursku ne ide kontinuirano, već se raspisuju tenderi za izvoz određene količine u određenom periodu u okviru odobrene bescarinske kvote.

Kvota za 2016.

Kako su pojasnili, kvota za 2016. godinu je 10.000 tona govedine. Tursko ministarstvo poljoprivrede još nije raspisalo tender za ovu godinu. Primjera radi, na tenderu će

biti tražena određena količina, recimo 2.000 tona, tako da će biti tokom godine pet tendera. To sve zavisi od potreba Turske.

“Prema našim saznanjima u toku je objavljivanje jednog tendera za bescarinski izvoz mesa u Tursku, ali se još ne zna koja količina će biti tražena”, kazali su u Ministarstvu.

Vrijednost bescarinskog izvoza mesa iz BiH u Tursku u prošloj godini iznosila je 87 miliona KM, u 2014. godini 5,6 miliona KM, a u 2012. i 2013. godini simboličnih 6.000 KM.

On je podsjetio da je Vlada Turske odobrila uvoz smrznutog i svježeg rashlađenog mesa iz BiH u Tursku u količini od 15.000 tona godišnje, kao i 1.000 tona prerađenog goveđeg mesa. **J. Sa. - A. G.**